

文 274.431  
184  
計





葉文莊公全集

水東稿

開封紀行稿

菴竹堂稿

涇東小稿

和山東勝覽詩

賜書樓藏板





原序

李東陽撰

葉文莊公集若干卷帙同而名異其曰水東稿者爲諸生及爲給事中叅政爲都御史巡撫宣府而作曰開封紀行稿者爲給事奉使河南而作曰棗竹堂稿者在廣東西巡撫而作曰涇東稿者爲禮吏二部侍郎而作詩則以次彙錄文則計體而分皆公手自編定而摠之曰文莊集者則其子貢士晨所名蓋將爲天下道而不敢以私集視也余嘗讀而論之曰公之文博取深詣而得諸歐陽文忠公者爲多公雖未嘗自言然觀其紆餘委備詳而不厭要知爲歐學也夫歐之學蘇文忠公謂其學者皆知以通經學古爲高救時行道爲賢犯顏敢諫



爲忠蓋其在天下不徒以文重也後之爲歐文者未得其紆餘而先陷於緩弱未得其委備而已失之覲縷以爲恒患文之難亦如此苟得其文而不得其所以重天下且猶輕之而况乎兩失之者哉公學勤好古而志切濟時其在朝廷敷陳獻替多見采納在藩鎮威惠並行在部曹清鑑雅操始終不貳其正違志拂意不克自盡則歛歔輦感若有已而不能已者然則得於歐學也顧不已多而况文哉今論者無問不可文必歸之翰林政必推之法家執議如此則其勢不容以不判若持法守律又能以經籍爲根抵以文章爲藻飾爲天下重者獨非人之所難哉國朝文臣得謚爲文者翰林之外近

特惟吳文恪公訥魏文靖公驥姚文敏公夔及公要諸當世誠不可易得予生也晚所接見者不過一二人公於我蒙翁岳公爲知己故雖不敢知公而獲接言論得其大者凡所以爲公計不止爲當世道也因以貢士之請爲序公諱盛字與中別號及菴所著有奏諭錄及水東日記則其家所藏故不載云



葉文莊公全集序

明初二大事紀曰遜國靖難曰繼及復辟人臣之處其  
際以類從者亦難矣哉而人臣之品亦有四曰懷舊曰  
圖新曰殉節曰守職不遷重社稷無私畸于新故永樂  
之際難言矣景泰天順間幸爲薛文清不幸爲于忠肅  
雖徐有貞謂不殺于謙則今日此舉爲無名而忠肅功  
在社稷久而益著豈有貞輩可得而泯滅且有貞之名  
至今安在予於是讀葉文莊公之集重有感矣公爲正  
統十年乙丑進士十三四年爲兵科給事都給事出河  
南賑濟遂不與土木之難景泰元年春還朝八月駕歸  
居南內明年出爲山西布政司七年外艱歸亦不與復



辟事天順二年召爲右僉都御史巡撫兩廣八年移鎮宣府爲丘文莊及李文達所忌終天順時不內召此公別歷于正統景泰天順之間者也公之爲諫官也以文章爲政事及外爲藩撫則以政事爲文章雖其身未與土木復辟之事而公忠體國善處人骨肉之間不爲利煽不以害怵且其意尤不在名故其調劑在隱微之際而赫赫之譽于景泰天順兩無所與其疏進匿名書以潛悟景皇帝之心雖王文阻之而亦有所不顧此天下之所不及知者也予特表而出之以爲世則謂人臣不幸而值國家反覆兄弟之變當如是也公集以類編文以年紀詩而以官與地分爲藁名皆手自編定長子舉

人晨請李西涯先生爲之序統名之曰文莊公集其爲諸生及給事中山西布政開府宣大所作者曰水東藁爲給事奉使河南者曰開封紀行藁巡撫廣東西者曰菴竹堂藁成化初爲禮吏二部侍郎者曰涇東藁此公之文章可得而見者也巳巳之變公率同官具疏請誅諸大帥扈從失律者以謝天下然後振旅討也先三日內疏七八上皆中機宜于忠肅深倚重之更委曲微辭以救直言之中書卽夕通疏以阻權姦之大用寧讓尹旻爲冢宰終不肯一見懷恩寧微服輕舟不肯通州府受餽遺寧徒行不肯儼然席吳撫之騶乘公之高風亮節卓識正氣非文章可得而盡余因想見公一時之人



物將以開二百餘年之太平其元氣磅礴而充周其人  
心風俗樸畧而蘊藉祇欲爲國家濟實用而不爲沽直  
之虛聲爲僚友鄉邦厚情愔敦古處而無事激昂標榜  
之意氣公之集具在可按而覆以視後之黨人之才士  
雖賢者不無慚憾益以歎公之人而論其世爲不可及  
也矣李西涯稱公之文得歐爲多尚未免文人規規之  
見公蓋自成其文章者也詩不必其似杜而無不可爲  
杜文不必其似歐而無不可以爲歐文從理順直達其  
胸中之意而止或以爲紆徐或以爲委備則亦隨其入  
心耳目之所至謂必有所倣而肖之公不爾也此世運  
人心之撰結令後之人必強而肖公之文則亦有所不

能至蓋自然而文者文之宗無意于文之工者工之至  
此余所爲低徊歎息追慕而不能已已也是集始刻爲  
公孫衡州少府淇世旣遠板漸剝缺六世孫工部都水  
司主事國華時在杭主權政因謀重刻以兵亂未就國  
華恒自悼更居視二十六年久未死未遂其志瀕沒遺  
命其子奕苞曰我偷活草間數十年無所用惟見汝兄  
弟成人獨未見文莊先公刻集成爲恨耳汝曹勉之奕  
苞益自力合羣從兄弟憲副方恒侍郎方藹等將謀成  
事適士望客崑山奕苞奉先集下拜懇爲之序望感其  
意謂窮約之老亦強與國朝文憲事遂不敢辭文集外  
有奏疏及水東日記各若干卷向無刻本六世孫進士



重華亦權杭南新關鏤板行世云南昌遺民躬菴彭士  
望撰



茲序蓋作於庚申辛酉年間不閱數年學亭文敏二  
泉諸伯考相繼下世先集未謀剖劂又數年先君良  
齋褻集繕寫勉力獨任始得授梓將成先君遽捐館  
舍故序目發凡皆未詳備愚兄弟才旣謏劣交遊復  
淺雖欲卽成先業展轉因循嗣後伯兄大年薄宦數  
載仲兄敬禮久病先亡歷於今凡三四十間梨棗塵  
封篇帙顛倒爲子孫者寢食不安近從未刻縣誌中  
搜得茲序因用爲弁粗製目次以五種稿貫爲全集

三十卷祇以詩文成書亟於問世其餘年譜傳記像  
贊碑銘或列國史或載家乘並未及登俟丐鉅公手  
筆當再補凡例細目 己未夏五八世孫九淵謹識



葉文莊公全集目

卷之一

水東稿一

賦二首

四言古詩三首

五言古詩四十四首

七言古詩五十七首

五言律詩七十二首

五言排律二首

卷之二

水東稿二





七言律詩二百六十首

卷之三

水東稿三

五言絕句三十三首

六言絕句六首

七言絕句二百十首

集句十六首

辭七首

卷之四

水東稿四

書一首

序四十首

卷之五

水東稿五

序四十三首

引九首

卷之六

水東稿六

記十三首

傳七首

志一首

說六首



贊二十二首

箴二首

銘五首

卷之七

水東稿七

碑一首

墓誌銘十六首

壽藏銘二首

墓表四首

行狀七首

卷之八

水東稿八

祭文二十三首

題跋三十四首

雜著三首

卷之九

開封紀行稿一

雜體詩七十三首

卷之十

開封紀行稿二

雜體詩六十七首

卷之十一



開封紀行稿三

雜體詩一百十首

卷之十二

開封紀行稿四

雜體詩詞九十八首

卷之十三

開封紀行稿五

雜體詩四十首

卷之十四

菴竹堂稿一

四言古詩五首

五言古詩四十首

七言古詩三十四首

五言律詩六十九首

五言排律二首

卷之十五

菴竹堂稿二

七言律詩二百七首

卷之十六

菴竹堂稿三

五言絕句三十八首

七言絕句二百十九首



卷之十七

菴竹堂稿四

七言絕句九十首

聯句一首

集句一百五首

操一首

辭七首

詩餘五首

卷之十八

菴竹堂稿五

序二十七首

引二首

卷之十九

菴竹堂稿六

記十四首

傳一首

說三首

贊十六首

銘四首

卷之二十

菴竹堂稿七

神道碑一首



墓誌銘六首

墓碣一首

壙志一首

墓表五首

祭文十一首

卷之二十一

菴竹堂稿八

題跋一百一首

雜著七首

附錄門帖子

卷之二十二

涇東小稿一

雜詩一百三十九首

卷之二十三

涇東小稿二

雜詩二百一首

卷之二十四

涇東小稿三

序二十二首

卷之二十五

涇東小稿四

序十八首



引一首

卷之二十六

涇東小稿五

記十七首

傳一首

說一首

贊九首

卷之二十七

涇東小稿六

墓誌銘二十二首

壙誌四首

神道碑銘一首

埋銘一首

卷之二十八

涇東小稿七

墓表十四首

祭文二十六首

卷之二十九

涇東小稿八

題跋六十一首

雜著三首

句子



卷之三十

和山東勝覽詩

原倡五十一首

和韻五十一首

葉文莊公全集目錄終

水東稿卷一

葉文莊公全集一

崑山 葉 盛 與中著

賦

錫老堂賦

為沈簡庵先生作

夫何一偉人兮鍾堪輿之穌粹蚤奮躋於亨衢兮曠千古之慶會聖繼聖以馭寓兮置左右而弗遷亶一德以獻進兮文五采而敷宣方黃髮之眷倚兮羗心搖搖其南下日功成而退兮曷不鑒乎時序老聃又告予兮曰知足其不辱汨遵道而迴軻兮敢於此乎淹宿朝隲辭以乞身兮夕溫詔之垂就匪舊人之忍輟兮念賢勞之已久撫吾心之徇義兮亦君道之孔仁顯  
邈其弗顧



賦  
今特有味夫道真散金貨以爲構兮薙蕪穢以爲圃克  
德澤以爲基兮揚恩波以爲渚面九山之蒼蒼兮濯三  
泖之瀾瀾廣仁智以與處兮樂其樂之靡已惟嘉賓之  
有徠兮爰酌清而薦芳廓王道之蕩蕩兮偕擊壤以相  
羊攀疏傅之逸駕兮又耆英之未遠也諒遊鱗之思返  
兮亦飛鳥之知倦也篤好修於中兮事天君以和平忘  
累役於其形兮庸屏謝乎營營儼襟如之襟裳兮謹抑  
抑之威儀規與矩其示則兮眇小子其敷之彼典刑之  
斯在今紛總總其罔墜謂有光於前修兮豈惟覺夫來  
裔諱曰日月忽焉修名立兮逍遙容與望莫及兮若出  
金石和其聲兮考諸其躬德人之成兮耿耿其懷知不

忘兮吾皇與民同壽域於八荒兮

怡靜草堂賦

葉子下玉峰汎松江過蒲溪之善里問怡靜之草堂粵  
有茅茨不甃不牆環植夫不可無之竹彷彿乎無何有  
之鄉于時主人出迎衣冠儼雅速客意誠其辭甚寡旣  
升賓階爰入其室窗几灑虛其淨如拭素琴在壁經籍  
滿前爐熏雖設寂而未烟晉摹唐繪墨色相鮮簷楹之  
下綠雲娟娟筆硯之傍蒼雪翩翩惟一榻之悠哉顧四  
壁之蕭然予旣就席目主人而告之曰諒哉堂乎名不  
妄施瓊瑤絲竹吾知其莫窺奇花異卉吾知其匪宜卜  
居於此吾蓋不知寒暑之幾易其時矣願聞厥靜之所



以怡可乎主人曰春日載陽吾竹始萌亦有蕨薇之多  
釣有資乎羞糗非其力不食非其道不行期有以爲堂  
之光夏雨旣沐吾竹如玉桃笙乍收黃粱未熟心解慍  
之遺聲謝采蓮之豔曲毋爲斯堂之辱秋風蕭蕭吾竹  
寂寥朝夕相看乎此君門巷何有乎誼囂罷製桓伊之  
笛棄去許由之瓢於以增吾草堂之高冬雪放晴吾竹  
青青倚竹危坐對雪橫經彼昏不知羔酒芳馨而吾獨  
樂夫吾心與此境之俱明其無愧乎吾堂之所以名予  
曰有以哉吾嘗求夫主人之夙昔而頗悉夫主人之所  
志也方其壯時金陵泮水唾手功名芥拾青紫棄而不  
爲動色甘旨其心固已安於靜矣而亦未始忘乎世也

中歲以來侯門戚里抗顏爲師王公弟子此其跡似不  
專於靜矣而亦其心之所不得已也則夫昔日之幽憂  
苦思固不能奪志於清風之樓而今日之高懷雅志亦  
豈能忘情乎江海之涘所謂忠孝同歸卷舒異勢介憂  
樂於兩塗貫窮達於一致者主人其是矣彼役志富貴  
者貪戀靡慚果於忘返者累徵不起其視主人不猶蛭  
蟻之於神龍駑駘之於騏驥也哉于是予爲主人造草  
堂之賦繼之以怡靜之歌蓋庶幾乎主人之意歌曰我  
怡靜兮伊誰與儔不知我兮謂我爲羊求爲王子猷知  
我兮謂我爲諸葛武侯爲春陵之周我怡靜兮誰與儔  
靜兮靜兮惟德業是修我安適歸兮尼丘尼丘



四言古詩

具慶堂詩 有序

世謂父母俱存爲具慶姑胥顧廷用氏取以顏其奉親之堂搢紳大夫士多述作以致嘉美之意一日來請言夫慶而至於父母俱存慶斯具矣亦嘗究夫慶之所自來者乎前人開其慶以垂於後君上隆其慶以錫於下然後父母得以慶有子人子得以慶克養也使若家德之不醇至治之不作雖欲享有此慶得乎易曰積善之家必之餘慶書曰一人有慶兆民賴之此之謂也其慶之同於廷用者多矣或徒知樂焉而昧其所本因廷用之請作詩以告之詩曰

登彼堂矣言侍夔夔厥侍伊何父嚴母慈曰鍾盛福偕老期願蟄蟄振振繞膝以嬉維肉在俎維帛在櫛凡百所欲我曷敢違真樂至願孰其可支允茲有自我詎忘斯積善累仁祖宗所貽匪伊所貽我曷致茲至仁大德聖皇君之匪伊君之我寧弗危迓承以德慶乃弗隳允懷勿替爰用作詩

程氏偕庵碧蓮圖

碧蓮美世德也

猗彼碧蓮揚揚其香雍州之產程氏之祥 程自孝肅暨於清卿蔓延六葉與蓮俱榮 盱江瀾瀾偕庵峩峩栽培封植悴而復華 彼美碧蓮繼今伊始與世與德



千禩靡已

幽蘭琴操送張廷采赴太學

空谷逶迤幽蘭菲菲誰其紉者有燁其禕之子于歸  
言送于野野有蔓草吾寧與處歸兮歸兮於子何郵  
遠莫致之吾將焉求

五言古詩

書懷

挾策拜彤墀鳴玉趨金鑿豈不重君恩遠遊非所安念  
我堂上親白日涕闌干白日不可留中宵坐長歎昨朝  
接家書望望在能官所幸兄與弟庭闈奉親歡我欲往  
從之關河杳漫漫目極天南雲安得凌風翰

寄陳孟佐朱希仁

高岡有鳴鳳六翮凌太虛一入上林中飲啄常晏如啾  
啾黃口羣胡能與之俱懿彼鸞與鳳遠在南山隅

九畹餘芳圖

楚澤香揚揚湘皋綠披披曾因一葦杭采之復采之芳  
馨挹不厭所貴良在斯願言寶紉佩永慰平生懷

輓竹居處士

東南有佳士佩服光陸離一屢松水濱旁有修竹枝所  
慕德與義所樂書與詩凶年罄儲粟忍見吾人飢棲遲  
坐成老敢言天下奇圖報終不忘教子師臯夔觀化亦  
有道辭榮竟何之峩峩松下臺上有述德碑無因灑麥



飢草露空悽其

題漁樵畫贈錢景寅

我家松水濱君住虞山阿投柯梁父吟濯足滄浪歌放  
曠亦已適柰云遺世何買臣豈不遇尚父終不磨幡然  
慕大隱獻策金鑾坡聖皇天地仁並畜無譏訶丈夫志  
伊尹温飽焉足多

恕軒爲劉典史賦

劉君尉大邑矯矯鸞鳳姿三年邑稱治恕以揭軒楣宣  
尼有遺訓終身可行之况爾民父母無乃尤所宜林林  
總赤子欲惡同我私行兮不善推癢疴那復知所以軒  
中居目擊感厥施古來循良者其道端在茲願言永勿

諛彤簡紹餘輝

送仲四弟南還 六十韻

我家本名族中葉多不支嘗聞我父言請爲汝陳之昔  
當趙宋間少保生其時同里衛政府寔締因連私亦有  
官知錄弈世光門楣命誥及家乘曾爲後人遺夫何宗  
黨中乃有黃冠師驅瘡擅異術落鬼不可羈去家下沙  
里故物因共馳乃維秀實祖生丁元祚衰熒熒館金氏  
北遷始來茲擊鼓時宴客肯問家無貲逍遙武林路爲  
愛山水奇詩文誇妙絕遐邇咸見推疾惡曾擬作相傳  
迨今垂篤生東野翁葆光寧宅卑頎然老曾祖直氣人  
共知大父繼鄉正無間稱仁慈胡爲未下壽我父悲連



湏年纔廿二三辛勤自扶持我母躬執饋夫母心怡怡  
撫我伯兄氏不殊已出兒我年甫七歲讀字閑威儀十  
三我何苦哭母不得醫十七遠庭教奮身遊泮池悠悠  
近十載始列題名碑龍顏日相近鵝序日相隨兢兢勉  
從事敢言戾家規天家已云樂南望猶攢眉去年汝將  
命慰我天一涯驚歡見顏色翁好真熙熙常言振吾宗  
非我兄弟誰願惟加進修那復效頑癡連牀僅三月告  
行路透迤手足當如何相對忍此離凡百我中素皆汝  
職所宜征車戒勿發聽我前致辭我家舊塋宅封土何  
纍纍累世託遺體吾母亦在斯一逼故居側一臨溪水  
淵高原謀共遷此志久不移王事云未暇動靜固有期

汝歸且封護勿使草莽披舊族異居處北南亦參差祖  
宗衍遺澤均是派與枝親疎未全譜春秋未新祠嘗觀  
薄俗人血氣紛乖虧太半因異姓骨肉生猜疑汝歸重  
源本母爲路人嗤我父今六袞黑髮將絲絲雖幸致祿  
養最勞馳遠思嫁娶尚經畫門戶多網維慈母稱聖善  
高堂坐含飴伯兄志成立姊氏恐寒飢伶仃兩弱妹禮  
聘猶未施一家隆孝愛歸哉汝勿遲汝歸孝愛隆庶不  
汝瑕疵吾心匪他欲先業不可隳光前更裕後丈夫在  
有爲不盡弟兄情聊復寫篇詩

恩幃堂

大哉資始功萬彙鈞覆幃豈不重生成罔極曷云報聖



皇古唐堯仁恩浩無窮垂髻與戴白驪呼八紘中况乃  
居禁垣春陽本先及昔分若敖餒今詠螽斯什每於骨  
肉間自荷皇天慈報德諒匪易臣職當勉之願同子若  
孫修德永無敷上以會天寵下以衍先澤

畫蒲萄

蒲萄產龜茲或云貝丘谷遠物何足貴畫史寫盈幅老  
蔓百尺強密葉藹春綠驪龍鐵作鬚連蜷亦相屬纍纍  
子熟時明珠光奪日釀之可爲酒高價論斗斛對茲感  
純孝豈曰克口腹千載陳納言無慚穎考叔

輓唐同知

且處泉氓上暮宿吳山阿人生忽如寄千秋亦同科行

行西飛雲悠悠東逝波物理諒云爾胡爲起哀歌哀歌  
有餘悲念君實蹉跎強仕始佐郡知非遽沉疴大老豈  
尚父早達非甘羅君命一何舛君才一何多天運已如  
此傷哉將柰何

送夏靜學瑞州知府

吾崑信多士瀟灑稱瑞州墨君陋文同楷法凌鍾繇置  
身霄漢上脫畧尋常流後生媿區區儀刑仰前修

二

憶昔文皇日階拜擢高第宸翰正名書昔人罕遭際高  
文屬椽筆碑板照華裔品題重綸言曰臬非第二

三



中祕歷年所陟秩遷考功迺無簿書累仍以筆札供黼黻効華勲令譽方隆隆誰挽亨衢轂大府來吳公

四

建城古名邦民淳寡器訟鳳山臨錦水文儒向來重瘡痍荒歉餘榱桷明堂貢去去旣厥心洋洋藹歌頌

五

秋風吹庭樹黃葉倏已零君侯赴藩守暫出都門行慷慨臨別言繾綣雙玉瓶及人良足慰遠去難爲情

高郵劉知州永思堂

水木有本源人生亦如此所以君子心耿耿無時已太守古諸侯亦曰民父母惇行先化理斯民德斯厚高郵

古名州南北當衝要常聞路人言太守能身教太守今劉君劉君古循吏作詩匪徒然重告觀風使

友梅爲鄭處士賦

友爲五倫一鄉國諒可親推而極天下乃至古之人鄭君非好奇何獨昧取舍老梅果何物寧爲定交者古人不可見古道今人誣久要言或忘久處敬必渝惟此孤山芳比德良有益歲晏共幽貞心期與清白乃知鄭君者雅志端在茲嗒然起長喟感彼伐木詩

王廷璧學錄挽詩

行行復行行輻輳不停轉向來挽歌人重爲吾鄉彥生別或重逢死別那復見傷哉念耆舊臨風淚如霰



二

君昔奮科第儒官致身早既造羅山士再典新昌校教  
專學彌充任久聲逾好至今諸生言真不媿師道

三

需賢際明聖拔擢升橋門朋儕豈不多衰然出其羣猶  
介亦古道端確非常倫司成董狐筆鑿鑿銘墓文

四

因懷我疇昔識君玉河口傾蓋卽相喻豈在接杯酒過  
從麗澤資晤語疑義剖天胡不我相遽爾奪嘉友

五

輜車旣云遠挽歌空復情生焉囿於命死也垂其名虞

山不改色岵嶢鬱新塋高車過者誰請式文先生

題畫送別

空谷何所有清風日紛披崖石含古色草樹發華滋中  
有幽蘭芳亦有修竹枝修竹何楚楚蘭芳自猗猗堅貞  
君子節婉孌佳人姿允矣不同俗傷哉未逢時贈行豈  
無意歲晚長相思

終慕堂

親存固所慕親沒傷歲時人生百年內耿耿有所思所  
思在吾親終身荷恩私報德諒微淺撫已將何之中天  
懸白日無言淚空垂不見仲由氏風樹動嗟咨後來坐  
重裋負米切中懷亦有歐崇公慘戚申訓辭養薄且不



克祭厚徒爾為歸雲去絕跡逝水無還期俯仰千載間  
大舜真吾師

岫庵為永嘉章雲伯題

峩峩錦屏山平陽古稱望山高聳孤岫飛雲自來往若  
人山之陽誅茅理新創日夕與山接山雲亦相傍掀髯  
灌木陰挂笏白石上影澹籠葛巾氣蒸潤鶴氅出入本  
無心為霖人所仰暫出教名邑久別心惘惘丈夫貴澤  
物所及須曠蕩且遲還山約噉噉正渴想功成諒有時  
期爾偕稅鞅

題盛進士扇

我家無長物惟此膝上琴泠泠七絃奏悠悠千古心塵

俗諒莫解哇淫寧見侵黃金鑄子期銷鑠邈難尋逢君  
試一鼓未為少知音

送高進士瑛為焦戶侍營墓

溽暑當夏末炎風煽前楹我友使者才承命歛以興山  
川渺河雒驛駟戒修程念子崇古學古道亦已明卜鄰  
既云樂化離空復情奇文與疑義有待重合并

二

聖皇重才賢報禮謹常度生存隆爵秩死歿表封樹為  
臣良獨幸千春罕遭遇徇制法所存恤力民所慕仁義  
貴兼施尤聞急先務勗哉慎斯行庶以永終譽

莆陽方氏遷居四詠



刺桐遺蔭

簇簇刺桐花花開葉常後有斐金紫公植之遶間右數  
指五百齡根株已增舊豈無桃與李懿此蔭綿久

亞美流芳

亞美號仁里方氏夙所擇履道宜坦途居安比磐石先  
師有遺訓嘉祥視其積留芳久弗泯祕監君子澤

義井啓源

莆陽山水勝冽彼義井泉井泉忽不食伊誰能更延純  
翁族之良繼世光其先長令百代下淵源永流傳

澄塘鍾慶

卜居欣有託近在澄江口旣無車馬喧亦謝錐刀偶田

桑歲屢豐孫曾代能守君家有餘慶人言自堅叟

樂圃詩

抱甕朝涉園荷鉏暮經丘治生固有道食力恒見優敷  
榮藉膏澤取足供盤羞藥本雖或存蔓草弗復留老圃  
所願學迂叟吾之儔適意何踽踽味薄亦休休不識鐘  
鼎貴寧負廟堂憂

輓顏參政

參政澄江彥系出平原守生焉旣有聞死也當不朽聲  
名起科第旬宣及斯人丈夫貴立志志立道乃伸居憂  
徇民情乞閒避賢路道義可無虧進退良足慕悠悠直  
塘水峩峩大夫碑來拜有孫子千春無絕期



送金溥秀才還鄞 四十韻

鴻鵠不輕舉蒲柳非久質所以隱君子盤桓戒輕出維  
鄞山水清東州故無匹氣鍾多盛族門第羅甲乙強半  
事文儒金氏乃其一濟濟好兄弟閉戶理編帙伯兮早  
階升金門簪綵筆仲也邈懷念縮地慙無術一葦杭秋  
波到京祇旬日乍見意偏勤久別言逾悉學業■舊常  
鄉閭問寧謐平生友于情初不在私昵嗟予本僻陋頗  
亦志刪述於君兄弟間情親往來密退直卽會面午坐  
或過戍念子青雲器洗洗温以粟工詩李太白能畫王  
摩詰行囊何所有筆床與刀室事兄敢比肩愛我時促  
膝揮麈論王霸挑燈叙真率茗盃對爐熏清尊間瑤瑟

理窮先天祕數究黃鍾律膏粱豈不多獨覺神克實遠  
大方有期歡樂詎云畢涼風吹客衣孤館鳴蟋蟀翩然  
來我辭自云返蓬華高堂歲年高白髮不能櫛先壟老  
松楸中田剩粳秫豈不慕榮貴亦知懸爵秩材薄任弗  
勝器小憂必溢未能効勞勩且復免譏叱挽子子不留  
恍焉若有失聖皇急需賢廟堂疑與弼相君久儲材藥  
籠芝與朮知君材力優嘉徵諒堪必獨惜潞河濱雲帆  
去何疾沙頭酒已傾行哉日云吉音書勿金玉氣誼本  
膠漆努力加進修暫別亦奚恤贈言雖不多願比黃金  
鑑

寒尚寶草亭八詠



墨沼晴瀾

翼翼草亭好下瞰洗墨池初日浴光景迴颺蕩淪漪仙  
郎退直暇道士乞書時從教水波黑綵筆不停揮

書帷夕照

讀書有至樂那復論旦晚曜靈已西頽下帷不知返三  
餘謹學則一志探道本嗟哉仕旣優復此忘息偃

香爐烟篆

苔石不可掃爐香篆奇畫微微伏火温裊裊輕烟碧對  
之却紛慮寧復悲行役聞有素心人清言時促席

月檻絲桐

朗月下軒檻餘輝鑿素琴泠泠七絃上悠悠千載心古

人不可見古調諒猶今游神渺何許傷哉爲知音

蒲石層巒

崑山石色古俯映盆池清有草託靈根天天冬夏青詎  
惟徵壽豈亦以况德貞相過時見此得與幽賞并

棘垣深樹

周垣何所有棘樹葉蕤蕤中園剩佳木重陰蓋鄰里玩  
芳每遵行班荆或攀倚誰知大隱者不異林居子

春畦雨翠

轆轤掩春雨菜甲萋以繁不見苦苣輩寧令葵荏昏畦  
丁勤采掇晨夕媚盤殮先民有遺訓固當咬其根

秋徑風濤



自昔開三徑松竹日以盈涼風一吹拂洶洶波濤鳴不  
必求羊侶不必絃歌聲朝回散輕策洒然有餘清

眷令圖爲梁文著題

其豆本同生粟布豈無儲而何今之人古人曾弗如梁  
家好兄弟真不愧離渠

七言古詩

十八學士卷

晉陽一夕真龍起豪傑從遊古無比掖垣西畔館初成  
勅下尚書送經史承恩玉署均霑濡退直金鑾齊步趨  
閭之圖兮褚之贊瀛洲仙人還有無烈烈聲光誰第一  
善謀善斷應無匹經術詞章書法兼千載遭逢太平日

獨惜儉邪著作郎毒流幾欲移中唐

泉州姚氏終慕堂

悲風蕭蕭吹白楊傷哉孝子何徬徨塵滿遺書恨俱積  
淚灑叢蕙憂不忘生兒鞠兒恩罔極此世無由奉顏色  
原頭曾見寫銘詩兒心願比幽堂石

送孫翁歸雲中

西風遠道塵沙黃征車鱗鱗催曉裝白頭何事苦行役  
有子官家初拜郎錦衣遙迎出西郭行人盡訝爐烟香  
驚歡拜舞見顏色暖湯濯足升中堂視膳新炊太倉米  
獻壽累舉崑崙觴他鄉故里喜相見况爾父子情何量  
不才我亦金門客嚴親遠在天一方別餘半載非頃刻



白雲渺渺心茫茫前月得書腸欲斷今日送君情倍傷  
令子才華照京國丹山彩鳳鳴朝陽新詩多傳在人口  
笑談指顧成篇章講罷鳴琴宮羽作朝回灑翰蛟龍翔  
人言是父有是子挺然橋梓相輝煌三蘇詞宗詎云絕  
二郎相業良所望承歡就養藉天祿胡爲趣別歸其鄉  
菊畦好在秫田熟輞川不廢山前莊多君矍鑠老猶壯  
相違暫爾何徬徨推恩錦勅此時下趨朝會見來明光  
居庸迢迢關月墮雞聲馬色高低岡殷勤再進玉瓶酒  
明朝目斷雲山蒼

周宗德霽月軒

大風吹雲碧空淨天吳捧出瑤臺鏡銀漢搖光兔穎微

玉露溥香桂枝勁開軒有客元公孫襟懷灑落清囂煩  
夜深坐久得真趣圖書妙契應忘言

營建紀成詩

聖皇垂拱四海清光昭舊物持盈成深惟烈祖創鴻業  
綸音渙發圖神京兩宮三殿重修復六曹庶府皆經營  
司空祕監偕贊畫工師獻藝何其精良材鉅費自公出  
民不知勞喧頌聲道泰聿開千載運子來允協輿人情  
中外崇觀聳奇特峩畫棟連雕甍堯天化日照臨處  
煌煌紫翠相輝明宅中圖大勞繼述耀德豈止誇隆名  
聖子神孫壯基本萬歲千秋歌太平

瓊林宴歸圖爲章進士補題



瓊林宴罷歸來早馬蹄細蹴長安道藍袍漬酒御香浮  
金牌壓帽宮花巧到家下馬趨高堂慈顏百拜歡無疆  
君親圖報自今始明朝一表陳龍光

瞻雲爲范孝子賦

雲飛來奇峰之下如泉臺孝子見之心孔哀雲飛去百  
歲親年水東注孝子因之久延佇雲兮雲兮徒爾飛父  
兮生兒母育兒而今不見兒心悲雲兮雲兮徒爾飛淚  
痕不乾身上衣

合肥袁守貞八十

童顏雪鬢神仙客坐看弧南燭天白網緝翠靄流暎香  
燦爛黃華散秋色芝蘭玉樹羅堦前十觴壽酒開華筵

承恩有時賜鳩杖還見趨朝到日邊

四明章氏壽萱堂

君不見園中花東風吹落隨塵沙又不見道傍草一夕  
霜華變枯槁何如章家北堂堂下萱百年厚澤培靈根  
堂上慈親介繁祉日長來此停魚軒宜男已作當時佩  
豈但忘憂坐相對侵凌雪色幾枝存報荅春暉寸心在  
萱兮萱兮壽綿延恩承雨露何獨偏曾向瑤池問金母  
蟠桃與之同其天

輓董母

賢哉董母名家婦萬里雲輶去何久相夫不負活人心  
教子已誇醫國手珍珍鶴髮神仙癯誰言五福人間無



百年惟有原頭樹月明夜夜啼慈烏

楊氏積慶堂

楊君本是關西裔忠孝承家知幾世大父淳龐謹恪姿  
名重當時人罕儷阿父空懷濟世才風塵瀕洞登金臺  
萬卷遺書爲兒積百壺新釀逢人開言行恂恂重先德  
杖屨優游隨所適尤聞高義賑孤貧倒篋傾囊無吝色  
誰言報施成茫茫須知仁者多流芳由來造物有深意  
鍾英萃美生賢郎賢郎燁燁丰神秀殿陛承恩一何厚  
九重天語重敷宣百辟朝儀列先後明良契合多歲年  
褒封爲顯雙親賢回鸞錦誥從天降光昭存歿恩無邊  
世澤綿綿來者續堦庭濟濟森蘭玉君家積慶良未涯

爲作新詩被絲竹

思親堂

南徐少年東魯客陟岵思親九泉隔漆燈塵掩見遺書  
宰木風悲想玄宅聖皇垂拱治理新方從孝子求忠臣  
願移此心顯先德千古高相與倫

送劉欽謨

劉君劉君人中龍寒癯古貌霜崖松霹靂手段兵甲曾  
閱人炯炯秋波瞳時平不挽兩石弓殘編斷簡收全功  
二十辭家志亢宗雲衢萬里騰奔虹興來噓吸皆青紅  
下筆莫敢當其鋒主司開卷眼不瞢南畿第一誰先容  
英才濟濟登南宮翹然復出稠人中萬言長策聲摩空



學海迸出元無窮治安有道達帝聰黑頭詔許烏紗籠  
交遊海內窮西東少年美譽疇能同嗟予老大才不克  
向人徒自憐倥侗看花會上欣相逢笑談於我何獨濃  
連鑣三日馳青驄藍袍香重吹天風官聯粉署經秋冬  
論交自是追高蹤情真爲我罄乃衷且言願共勉厥躬  
丈夫有志非凡庸爲子當孝爲臣忠著書自笑隋王通  
作相肯羨唐姚崇詞章何足言雕蟲浩氣欲奪龍門公  
書法豈必師李邕秋蛇春蚓隨人工有時得意揮絲桐  
遙遙目送天邊鴻有時夜榻談非熊東華共踏聞朝鐘  
相親正爾相磨礪苦吟偶獨傷和冲封章惓惓陳九重  
休養願就藥物供皇恩曠蕩如昊穹賜歸便許尋吳淞

促裝南去何匆匆過予欲別心鬱忡灤河水新冰乍融  
一船曉發烟冥濛願君此去造詣隆先憂後樂真豪雄  
高堂况復未成翁顯揚有待推恩封慎勿戀戀棲茆蓬  
古人老去方明農雲龍風虎來相從悠悠盛名全始終  
悠悠盛名全始終

泣麟圖爲史秀才作

玄枵降精物有神四靈之首誰其倫貴德豈云誇麕身  
抱以義兮含以仁出必世治風俗淳于嗟見咏於詩人  
魯郊一日飛黃塵傷哉西狩何見噴宣尼下車涕滿巾  
可憐周道終沉淪百王大法請具陳絕筆寓意良有因  
方今四海皆陽春嘉徵上瑞無不臻史氏之子席上珍



咫尺看盡稱逼真悠悠往事且勿論丈夫好作人中麟  
題梅  
曾向西湖歎行役醉來愛坐梅邊石一枝斜倚晚烟青  
萬朵亂開春雪白回首舊遊今幾年風流空見畫中傳  
何當買却南歸櫂抱琴引鶴尋逋仙

送張布政赴福建

張君落落人中英平生襟抱冰雪清讀書有志占科名  
橋門早歲馳芳聲掄材穎脫承恩榮郡中別駕恩威并  
銜哀葬父歸東平去思戀戀衢人情三年枕函啼先塋  
上天悅鑒靈草生九重一日嘉孝誠表厥宅里勞經營  
歛來毗贊天官卿品量人物雙眼明相知推轂雲路亨

治裝又作閩山行嗟予忝預同寅盟誼隆不殊弟與兄  
臨岐惜別心怲怲看君此去慰黔氓慝不玩兮淑不驚  
熙熙萬井皆春耕他時使者求阿衡手持黃紙招霓旌  
復結飛佩還瑤京

杏林春意圖

廬山董奉奉仙人杏林生意何津津一株五株有定價  
千花萬花無限春仙人去兮杏難逐那復於菟司易穀  
披圖不盡古今情千載看君繼芳躅

居氏瞻綠軒

幽軒竹猗猗秀色凌歲暮若人軒中居云胡動哀慕憶  
昔先公對竹時詩朋酒伴相追隨只今永別重泉下見



竹頓使吾心悲物得君子名人生豈長壽因君試誦小  
弁詩靡瞻匪父靡依母

君馬黃送朱陳兩生南歸

君馬黃我馬紫君馬骨千金我馬日千里雙雙共逐東  
風行香泥蹴踏天街平眼前何人是伯樂此馬未必輕  
嘶鳴邊庭無烽不須御~~走~~放從教華山去

錢孝子終慕堂

孝哉古丁蘭刻木事其母錢君千載下高風與之友材  
木豈不良終焉易爲朽耿耿罔極心天地共悠久世間  
人子非丁蘭回視錢君顏亦厚

東隱爲雲間道士題

郡城東畔神仙宅路隔塵凡纔咫尺石楠陰重雨苔青  
野鶴聲高曉雲白草衣不作人間遊海天日月空湛浮  
明朝又赴安期約松花酒熟三千秋

送褚廷輝汝州學正分題得東郭草亭

君不見帝城東行近三里黃土圍墻一亭起山樗作柱  
葦爲椽容月棲風更藏兩檐前嘉卉開鮮鮮池頭活水  
流濺濺甘井鳴春菜生甲長鑱斲曉笋抽鞭時爲遊人  
宿車騎閣老留題在高處還稱離人敞別筵唱咽陽關  
忘行路亭前行路何悠悠萬里修程去不休勸君且盡  
亭中酒明日相思在汝州

雙節堂



朱家豕婦虞山錢介婦陳姓俱芳年良人伯仲楠與榎  
獻材始受京華塵自傷祐薄不可延後先長逝相棄捐  
哀哉二孀誰復憐上無翁姑下無田娣姒相看貌儻然  
此心誓與同貞堅晝行提汲古井泉蓬屋靜掩蒸炊烟  
繰成蠶繭搓木綿瓦鐙照影幾忘眠勤渠辛苦供橐餖  
四時享禴能無愆孤兒膝下縫衣穿買書授與求師傳  
人間回首時序遷向來綠髮成華顛大兒門戶能周旋  
小兒挾策朝九天有司列狀名牽聯綽楔行當表琴川  
清風凜凜金石鐫董狐載筆大於椽閨門志操人所賢  
皎如白璧秋空懸又如神劍出九淵千秋萬古光華全  
栢舟之詩久不編臨風試詠雙節篇

扈從宴集分得五雲峰

代

諸峰亭亭插天表中有一峰奇更峭爛然五色之卿雲  
飛來飛去周遭繞真陽觀前溪水深光華下映春陰陰  
濕烟垂空老龍起晴絲捲樹清猿吟粉署仙郎舊朋侶  
扈蹕偕來暫容與題詩不獨記曾遊重爲蒼生作霖雨

分得歌風臺送徐尚賓

漢家英主聞高祖會魏歸來氣如虎千夫萬騎止勿行  
醜酒椎牛宴鄉土酒酣走上泗水亭碭山不改當年青  
徘徊起舞君臣會慷慨悲歌父老情百二兒童歌且續  
不管行空白日速炎精已散事空傳過客至今談擊筑  
知君下馬臨荒臺古碑拂落千層苔高歌未得終三韻



長風颯颯從天來

梅閣爲松江張生賦

君家傑閣凌浮埃四檐况是梅初開登臨不羨滕王貴  
吟哦自得逋仙來雪花飄飄朔風冷便謂人間無此景  
叩門有客問揚州紙帳醉眠呼不醒

謝醫士

吾聞先生有道者錄錄醫師盡其下大丹本欲壽斯民  
白璧黃金不論價一壺城市度浮生誰計區區千載名  
文章偶託柳州柳從此人間識宋清

送江用良

太學十年人不識一日聲名滿京國揚廷未獻策萬言

入夢曾誇筆五色西風黃葉下金臺送君暫去待君來  
伍喬不是山中客定有文光徹上台

蕭公北貽安堂

君不見金谷園羅帷繡幕圍崇垣君不見平泉莊珍松  
寶檜連修廊富貴當時更誰敵可憐回首塵茫茫君家  
住近江之滸華扁新題照堂戶夜鐙窗下課書詩春雨  
原頭長禾黍游心有藝尤精專聲名不讓李龍眠雙眼  
閱人知幾許興來貌出真天然邂逅相逢卽相契爲我  
慇懃道情意堂中柱石期百年堂上翁孫見三世我聞  
此事深重君况讀太史之雄文乃知承家在餘慶富貴  
區區何足云只今四海昇平樂須君去盡麒麟閣殷勤



看取閣中人開國巍巍功不薄

歸耕詞

負郭田田何多下田粳秫上田禾昔年府公召使我田  
中長蓬科今年乞身歸荷鋤還向田頭過田頭白鬚走  
相賀快活不須官職大

輓姚女

香魂飄飄何處遊荒山高塚斷雲愁玉鏡臺閑人夢蝶  
紫簫聲咽鳳啼秋水雪肌膚蕙蘭質婉婉從師更無匹  
閨門淑德那可知老父當時把銘筆傷心老父有餘哀  
缺月易滿花還開獨憐一片蒼厓石鄞女韓孳安在哉

山水圖送李孟承吉安知府

君不聞廬陵山水名天下大江西來比嵩華峰巒轟轟  
虎豹藏波濤哀哀魚龍化紫翠插天知幾重日岡掩映  
月岡通玉芝瑤草蔭喬木共憐雨露栽培功萬派千流  
醴泉出吞吐烟雲浴朝日不是龍洲是鷺洲浪激輕風  
字成吉此中居者百萬家樵雲釣月爲生涯更聞鍾秀  
在人物賢才濟濟朝京華平生最慕幽深處自是人生  
苦難遇畫師有才真絕奇拂拭生綃寫真趣先生文采  
孤鳳凰十年太學講虞唐剡牘新承近臣薦一麾手把  
趨黃堂我今卷圖贈君去豈但區區寓離思東■難忘  
聖主恩具瞻直是斯民意吁嗟此圖還有情秋山高高  
秋水清廬陵太守姑蘇彥高節清風在此行



梅月軒

幽軒久與人事絕只種梅花伴明月  
花開月上來軒中塵世知誰更高潔  
此時清興欲成顛橫琴引鶴酒如泉  
吟到暗香踈影句風流還解讓逋仙

題唐馬

春郊十畝平如砥細草豐茸碧烟裏  
髯奚兩兩出城東手把金羈行復止  
紫騮前導七尺強後有青驄病初起  
爾肥爾瘠勿復言往時同渡交河水  
太平且復飽芻禾有待驅馳日千里

夢椿堂

大椿昔種高堂側堂上親年願無極  
昨夜夢椿青海頭

親顏不見增煩憂歲晏窮鄉雪花墜  
陽和不來椿已瘵始知談者是虛誣  
浪說春秋八千歲起來無語坐中宵  
此生何怙成悲號更堪一段淒涼感  
西風落木寒蕭蕭

送宜興鄒知縣

卓哉樂安鄒大夫襟懷炯炯涵冰壺  
作官初臨礪山邑大家小戶皆安戢  
一從遷官來義興草木不搖龙不驚  
竭來三載朝京闕善政千人萬人說  
義興之彥尚書郎銓衡掌握生輝光  
掄揚不泯鄉人願盡采歌謠寫成卷  
我來撫卷增歎嗟大夫有道誠堪嘉  
安得大夫三五輩盡福東南百萬家

金華童氏壽詩



金華山前激水濱太平民物皆陽春獨當全福者誰氏  
童家三老非常倫二老穆穆頭總白縣官累進高年帛  
木公金母是前身不信仙凡有懸隔甲子年回六十秋  
此日初逢第一周種得椿萱色長好任他海屋添新籌  
門前賀客多如雨寶馬香車不知數玄龜白鶴繞軒墀  
火棗交梨間觴俎森森蘭玉多孫曾諸郎迭進塤箎鳴  
繡衣獨有臺端客白雲望極難爲情難爲情阻官守君  
恩未報親恩厚因風聊寄一緘詩願親不老三朋壽

具慶堂

鶴髮童顏兩眉壽太守承歡更稀有春風五色舊縫衣  
夜月一樽新釀酒甲第初開具慶堂願推此意及逃亡

孝心化作光明燭徧照西河小家屋

百里皆春巷

新城令尹尚書裔政成百里真能事黃童白叟沸驩聲  
和風甘雨饒生意祇今邊鄙尚揚塵九重仁聖正憂民  
安得如公什百輦坐令四海皆陽春

壽萱堂

王家北堂何所有種得萱花慰慈母母恩浩浩如海涵  
辛勤曾爲佩宜男當時養子百憂集而今養母何能及  
種花那敢報春陽慈母見花憂或忘魏紫姚黃曾足道  
看到兒孫固難保但願萱花繞北堂母顏與之長不老

送葉繼武



吾宗自昔多才傑屹屹君家居太末鳳雛夙產丹山穴  
文采羽衣宮徵舌少年挾策趨金闕天門甲第居前列  
拜官秋臺事詳讞疑獄往往片言折玉勅推恩光烈烈  
庭闈在念心如結陳情喜得天顏悅南去匆忙來告別  
維時都城近三月連日餘寒欲飛雪調和造化須回斡  
百職正爾憂勤切何以贈子雙玉玦遙來勿遲意須決  
秋風蕭蕭掃炎熱珂馬期君共朝謁前人報國皆忠節  
請看高齋冠江浙

輓余母

寶婺無光雲漢淡白髮安人今已矣相夫不媿桓少君  
教兒共詫崔玄暉爲婦爲母皆稱賢乃知五福報自天

輓歌願入輿人誦清風永使閨門重

送劉生

草窗先生五男子玉樹芝蘭雜瑜珥陶家馬氏未足云  
公沙汝南差可擬伯氏問寢居京師仲氏高堂奉母慈  
二雛最小更奇絕閒常誦得先生詩先生有才清廟器  
况是平生仗忠義胡頭未剋未思家萬里沙場每馳志  
季也前日來蘇州又看承命展松楸都門携手話歸路  
寒日杲杲風颼颼我有老親頭半白北望長憐兒在客  
家兄小弟倘相逢須爲殷勤道思憶

野舟爲無錫楊叔釗題

野水不波風帖帖一舸中流小於葉岸花汀草暹繁華



筆牀茶竈輕豪俠想見來來去去時幾多魚鳥共襟期  
濟川才具君應是莫詠滁州西澗詩

壽某翁

炁炁雙瞳如碧玉高堂自譜長生曲十丈梧桐葉乍飛  
百斛蟠桃子初熟鸞馭飄搖鶴駕閒僊僊老在人間  
熙熙壽域從前少萬壽還將祝聖顏

趙司業梅庵

故園有梅花雪色照庵屋庵中讀書者清貞絕塵俗宦  
轍驅馳四十年此心只在梅花前玉堂時寫孤山詠青  
坊每進和羹篇潭潭國學都城下逢掖三千皆學者桷  
榱常作百花魁棟梁之具先生也


送魏舉人

歸州女子顏如玉出得宮門向人哭畫師聞之笑不休  
走迎馬首談衷曲玉顏固知君所憐黃金豈非予所欲  
天生麗質本非常肯與尋常共追逐如今宮裏三千人  
大半獻身遭刑足隨行逐隊竟晨昏妍醜不同同倚福  
君今北去走胡塵刮地風沙老皮肉子亦還家樂少年  
閱盡黃金終瞑目人生一世能幾何死不留名同草木  
當初隨例說黃金萬古千秋誰紀錄嗟哉畫師事失傳  
流芳遺臭豈徒然魏生魏生勿復道臨行贈爾歸州篇

聚禽圖

催花雨歇銅駝陌萬紫千紅足春色連翩百鳥集名園





P29



飲啄飛鳴惟所適君不見崑丘有樹何萋萋中有靈禽  
五色奇聖人在位將來儀嗟爾百鳥孰能與之齊

題王編修扇

風淒淒雲不飛蒼虬百十萬獻捷人間歸鱗甲光芒照  
寒鐵偶然蛻下如缺月玉堂老仙欣得之一鼓便除天  
下熱

送孫主事使貴州兼簡王總督劉參贊

朝下東華天欲曙策馬都來送人處供張爭看粉署郎  
頒恩遠向南荒去南荒醜類久屯蜂殘喘而今破竹中  
羽書夜到聞稱捷金帛朝馳重報功壯哉此行須不負  
驛騎匆匆戴星久聖諭親傳詔十行民風盡采詩千首

暫教書錦明閭閻買舟已艤灤河岸從知到日多奇翫  
高堂盛事陳帷幔賀客濟濟來文翰壽觴飛流燕以衍  
家慶如君復何惋我獨論交惜分散贈言願比文絲段  
受恩思報真長算卽今雲雷方邁難志士憂時久扼腕  
况乃磬磬苦天旱霖雨需材資漑灌吁嗟去兮滄洲畔  
翩其遄來勿羈絆贊化調元清海瀚如此榮名垂簡汗  
輓戴處士

鄱湖之東錦繡鄉鄉有君子今云亡難兄康莊一騏驥  
令器雲霄雙鳳凰老天福善亦何厚誥勅聯翩出身後  
使輶他日墓門前風雨梨花拜樽酒

題貓



捕獲勤渠大田靜稍遇憑陵爪牙勁嗟哉爾貓得其性  
法吏疆臣視為警

二

高臥黃昏閉白日醜類縱橫幾時息嗟哉爾貓失其職  
溪魚飽食曾何益

五言律詩

朝回雜興次高槎軒郊墅雜賦韻 十六首

舊友各西東鷗盟負海翁久無雙屐過近有一書通細  
酌燈前酒高談席上風相思不可見清夢繞吳中

二

寒日金臺午憑高氣培增魯連非國士賈島豈詩僧岸

憤朝酣酒橫琴夜剔燈匡時未有術書薦賢能

三

功名底用誇碌碌笑蟲沙戰馬輕千里戎衣重六花致  
君須相業報國是儒家誰謂登朝早春風鬢易華

四

粉署從容處長吟與獨行松高千古意草盛一春情柱  
頰當雲起揚眉待月生古來賢達士何事獨垂名

五

鄉國古婁濱棲遲念老親布衣元尚儉祿食未為貧奕  
葉看前世承家望後人幸憐兄與弟綵服侍閒身

六



一榻紅塵遠雲霄接帝居茶清秋夢後香散午朝餘洗  
研臨青李攤書走白魚明時非小隱烟樹渺匡廬

七

公餘勤學古性僻嬾隨時肥遯嗟盤谷狂遊憶漢陂看  
碁人坐久躍矢酒行遲海內同年友論心得共知

八

學海漲狂湍靈鼇上釣竿臚傳雲影動榜下墨痕乾御  
酒當歌勸宮花帶笑看春風人得意連轡走長安

九

故山南望遠天外只青青二陸名猶在三吳地最靈鬻  
文知價重看劒覺風腥自是心如醉誰云酒未醒

十

周爰來北郭退直下西垣藥石廷中議芻蕘野外言草  
行寧憚遠露坐不聞喧心切江湖遠非關憶故園

十一

九重天闕下何幸沐恩波政拙憐材短官閒愧俸多玉  
隄騎馬度青璣戴星過文字平生學遭逢正止戈

十二

書生鬢未蒼隨計出橫塘南省趨春雨東華候曉霜治  
安元有策却老本無方一飯皆君賜微忠肯暫忘

十三

官嚴如偈仄吏散亦逍遙苔石澆花竹茅齋縛葦蕭銘



心尚父獵回首買臣樵此日星軺起還過駟馬橋

十四

東郭路迂迴尋幽到水隈坐看人客醉歸愛僕夫催地  
白稀逢草亭孤不見梅幾因張祖席來此共追陪

十五

親從六龍遊蓬萊最上頭化行田父喜謀定虜人愁實  
行須教勉虛名不在求白雲飛去遠極日到長洲

十六

舊族吳淞上何時買義田不多囊底物莫少社中錢人  
樂承平世天交大有年未嫌蒲柳質長侍五雲邊

虞山歸隱

爲愛虞山好飄然獨解簪到家惟白髮戀闕有丹心樹  
密雲連屋簾疎月在琴江山舊民吏牢落去思吟

送孫處士

上國住兼旬歸田樂隱淪鳳毛蜚紫禁鶴髮照青春木  
落山迎客雲深鳥近人無勞問消息家教只清貧

適安堂

翼翼高堂上熙熙大化中道心忘物役天理覺春融一  
榻蒲團淨三杯野饌豐唐連蜀道何事走西東

送張令

迢遞城南路乘春客去時雪晴抽凍草風暝逼流澌已  
幸論疇昔邴堪話別離間閭知有望歸旆莫教遲



輓虞兵侍代

清朝祈父佐何事忽云亡報國心偏赤匡時鬢未蒼廟堂遺舊德泉石闕新藏邈矣鄉先達臨風徒自傷

驛程紀行十五首

夏口

曉出武昌樓官僚擁去舟櫂歌聞夏口驛鼓起中流歷覽非行役馳驅亦壯遊郵籤已先報明日過簿洲

金口

薄暮投金口舟人不敢開浪高風力勁雲暗雨聲來行李收詩卷羈懷閣酒杯坐聞鐘起處知有兩華臺

簿洲

遠使當南國狂遊及少年問程趨驛吏看雨過江船詩意青山外鄉心白鳥前王程苦無暇黃帽莫辭牽

魚山

寂寂魚山館敲門夜換船一燈聊自適千里竟誰憐牢落將殘漏依稀欲曙天老漁忘世慮沙浦正酣眠

鴨欄

未識來何地人呼鬪鴨欄好山濃翠積水淨潺湲民俗懷清議官儲愧素餐同行有前輩冰玉照人寒同行為王

副使瑄

石頭口

郵亭晝不關江水自潺湲船載黃梅兩人過赤壁山小



娃提甕出老父打魚還暫泊頻催發何曾半日間

城陵

江濤久涉險欲發問肩輿爲客三苗遠辭朝兩月餘風  
烟山寂歷茆竹路崎嶇最是憑高望湖光接太虛

岳陽

此地誇名蹟停驂試一過樓空餘瓦礫湖沒浩烟波憂  
樂真如此仙凡竟若何君山青未了對爾且高歌

鹿角

昔聞麋子國今過洞庭湖浩蕩踰千里周遭本一隅帝  
鄉紅日近親舍白雲孤豈敢輕風浪男兒早射弧

磊石

沙渚亂鷗羣平湖過幾分水吞雲夢澤廟食洞庭君寂  
寞鈞天樂蒼茫帝子墳不須頻弔古烟雨正紛紛

營田

落日湖邊驛塵埃不到門白波迎客棹青草近漁邨得  
意詩千首陶情酒一尊悠悠舵樓底心事與誰論

笙竹

亂灣三十六曲曲起盤渦雲淨千峰出江空一鳥過荻  
蘆撩客棹石壁挂漁簑詩料行來有能如此地多

彤關

漸近長沙郡危峰見祝融萬山皆拱北一水自朝東遠  
樹村村雨疎篁岸岸風好懷吟不盡都付酒杯中



臨湘

山村聯萬室江水近孤城白石留僧坐青蕪載鳥行時  
平方錫福年少已叨榮千載興懷處靈均與賈生

湘潭

樵歸嵐已重漁罷石猶腥一鷺當溪白雙楠著岸青苗  
人沙際見蠻語月中聽明日尋山路無眠坐驛亭

龍山道中

石磴重躋攀何能頃刻閒綠迷江口樹青擁馬頭山洞  
古春長在祠空夜不關行行莫相厭明日又塵寰

秋江送別卷

沙樹卷西風離愁起萬重一爲江上別多是夢中逢潞

渚飛寒鳥焦山急暮鐘金門有朝籍不得此相從

輓溫賢婦

笙鶴擁雲輶仙遊若箇邊有時聞婉婉無復見嬋娟帳  
掩香猶在奩開鏡自懸良人憐婦德爲爾一潸然

竹林書舍

新構讀書臺蓬門對竹開月移鸞影下風引珮聲來親  
膳萌堪煮儒冠籜可裁此中多樂趣何日共追陪

輓某母

媿德時承饋娠賢夜聽詩鄉邦存矩範宗黨慕風儀正  
切嘗羹養俄興化鶴悲郎君僚舊好因爾寫哀辭

送人之蜀



此日初相識今朝又送行交情將別淚回首不勝情揚  
子寒雲濶夷門凍雨晴讀書兼讀律行見有聲名

輓黃母

自是閨房秀來嬪道義家佳兒珠有耀清節玉無瑕未  
足雞豚養俄興風木嗟閩山思執紼道路一何賒

補硯詩謝徐尚賓

君才解補天此石落陶甄異域鐵重鑄荒臺瓦復全韓  
公徒有贊蘓子豈無田已遇長生藥從今不計年

送某太守

雲間新太守天上舊郎官素節冰霜潔清風玉雪寒政  
條崇禮樂家世尚衣冠燕寢重歸處斯民頌又安

瞿宗尹合葬輓詩

曾躋錢塘路從知處士名故家承厚澤上國遂高情鄉  
里思陳寔交遊哭范卿所嗟生也晚不及奠銘旌

二

自是閨房秀來嬪道義門黔婁遺布被陶侃具盤殮此  
日嗟乘化何時復弄孫高原掩雙璧南望黯愁覓

聞項璘省兄至京

故舊稀相見相過况弟兄温温燈下語戀戀客中情鄉  
里三年別關河幾日程若爲今夜月偏得照雙清

送陳生

鮑子從師日王郎坦腹時鳳麟高格調冰玉好風姿歸



試爛斑服行吟絕妙辭老子情獨厚未別問來期  
望大人到家書不至

聞說過揚州械書久未收固知鄉國喜還切道途憂祿  
食憐忠養官居負遠遊何時得歸省拜舞竹牀頭

送閻敬還南昌

膏雨曉霏微辭官獨歸正憐和氏璞忽憶老萊衣沙  
草迎潮沒江鷗近岸飛重來應得意臨別漫依依

宋處士合葬輓詩

蕭然隱者流常帶木棉裘潛德鄉邦重遺文弟子收南  
柯塵夢杳西夏客程修令孥稱純孝靈輻首故丘

二

鶴髮亂絲絲高堂祿養時未應仙去遠豈是夢迴遲陶  
母賢堪比軻親教可師四明山下石無愧史官詞

題畫

此地遠塵寰居人自往還雨荒江上路雲礙屋頭山黃  
葉禪關掩滄波釣艇閒幽棲曾有約回首愧朝班

送陳宗理還湖廣

我愛陳無已襟懷玉雪清京華初會面江漢舊知名酌  
酒留人醉題詩對客評相看應不厭相送若爲情

晚酌書事

燈火照黃昏寒蟄亦在門病妻相慰藉弱女解溫存衣  
典存書卷囊空剩酒尊悠悠百年內人事底須論



己巳十一月初八日陞兵科都給事中

栖栖本一寒忝竊侍金鑾已愧疎供職何堪驟進官臣  
材鳩共拙聖澤海同寬感激思禪補心懸百鍊丹

輓蔡秀才

茗水多名族神駒美爾才素襟蟠錦繡清論落瓊瑰用  
世嗟無及遊仙竟莫回秋風三疊在吟罷不勝哀

常熟王氏挹清樓

畫棟凌雲起凭闌獨嘯時虞山青未了滄海浩無涯爽  
氣團書幌晴霏落硯池故鄉真樂土應笑仲宣詞

寄陳維藩

迢遞中州路懷君思莫裁如何半年別不見一書來落

日南禪寺西風古吹臺舊遊多感慨詩寄獨徘徊

谷給事中持節使大同

去去不須論天寒霜雪繁親王登玉牒使者出黃門漠  
北兵戈事雲中父老言歸時須記取明主正臨軒

尹善人輓詩

善人今已矣撫卷動遐思萬里從兄日孤雲憶母時喬  
林星落落宿草露垂垂寂寞吳山路何由酌一卮

安分軒爲嘉禾曹氏賦

何處託幽軒青山綠樹村傳家惟蠹簡留客有匏尊鍾  
鼎須行志山林可避諠無加亦無損此意欲忘言

辛未殿試彌封



雙闕初傳勅羣龍已滿朝文光回玉殿王氣薄璇霄進  
讀推諸老彌封預末僚就中誰第一忠孝荅軒堯

賦得虞山送張仲光舉人

突兀當南紀蒼茫映海波地靈生物異天近出雲多曉  
日開屏幃春風艷綺羅言公祠尚在君去得重過

輓楊母

梓里垂髫日花封駐節時久知楊母行不忝女中師弔  
鶴來何遽乘鸞去莫追麻衣悲令子含淚乞哀詞

歸養詩爲德清朱玉作

得請早還家娛親物物嘉鱸魚初入饌蓮子已收花細  
酌烏程酒重烹陸羽茶人生有真樂軒冕是浮華

送黃叔潤兼簡元德

故人別我去繾綣意何如未獻劉郎策還窮伏氏書驛  
亭新調促京國舊游疎好與天平老同來侍直廬

富春堂

聞說幽棲處高堂瞰水濱詩書百年事花竹四時春俗  
客何曾到山翁或與鄰無由謝塵鞅來訪葛天民

寄張茂蘭

海上通波里君家舊有名好山凝晚翠喬木向春榮共  
說耽吟咏仍聞絕送迎明年汎秋水來敘別時情

忠愛堂

每愛桃源令君親兩不忘丹心懸上國白髮夢高堂吏



情先治粟農閒更樹桑王喬與仇覽千載共流芳  
病中聞林雲鵬至自開平走筆寄之

今日謝朝謁開門得好音黃塵憐我病白日照君心不  
用煩書簡惟應便盍簪形容可憔悴還似夢中尋

五言排律

賦得松江送盛用章

淼淼湛清秋乾坤日夜浮西來元自漢東下曲通婁巨  
浸三江表佳名一郡留鴟夷今已遠神禹昔曾遊臨別  
空釀酒相思擬汎舟知君懷聖主心逐水東流

寄題管氏園亭

第宅依籓邸風烟接郡城池清同漢沔石立擬蓬瀛一

曲晴湖遠千章夏木榮竹闌雛燕語蝸壁古琴橫俗客  
稀交往家童解送迎笋鞭初入饌魚尾旋分羹抱甕機  
心息操觚藻思精主人真趣適我輩好懷清對酒鶯歌  
起彈棊鶴夢驚雪巢時隱几烟帳夜支檠月到花留影  
風來竹作聲倚窗閒嘯傲扶策恣吟行彷彿山中樂優  
游物外情還期持節暇來此細酬賡





五言律詩

水東詩卷一

樂文以公集一

Table with 10 columns and 10 rows, containing faint vertical text. The text is mostly illegible due to fading and bleed-through from the reverse side of the page.



